



Sesida dals

21 d'avust 2018

Communitgà ils

22 d'avust 2018

Protocol nr.

643

Dumonda Tomaschett-Berther (Trun)

concernent il subvenziunament da purschidas da la tgira d'uffants complementara a la famiglia en las regiuns

Resposta da la regenza

La tgira d'uffants complementara a la famiglia è in instrument impurtant per promover la cumpatibilitad da la famiglia cun la professiun. En il program da la regenza 2017 fin 2020 è perquai vegnì formulà il punct central da svilup 11/23 "Promover la coesiun sociala e garantir la segirezza sociala" (PS 11/23). Il PS 11/23 cuntegna tranter auter la finamira da rinforzar e da promover forzas da lavur svizras tras purschidas pertutgant la cumpatibilitad da la famiglia cun la professiun.

La confederaziun dat novs impuls finanzials en il sector da la tgira d'uffants complementara a la famiglia. Ella vul sustegnair finanzialmain ils chantuns e las vischnancas ch'extendan lur subvenziunament da la tgira d'uffants complementara a la famiglia, per sbassar ils custs dals geniturs. Da quai duain profitar geniturs cun activitad da gudogn, geniturs che tschertgan ina piazza u geniturs ch'èn en scolaziun.

L'analisa da la finanziaziun existenta da la tgira d'uffants complementara a la famiglia en il chantun Grischun duai mussar tranter auter, sch'il model vertent ademplescha ils criteris da la confederaziun u sch'i ston eventualmain vegnir fatgas adattaziuns.

Actualmain existan purschidas reconuschidas da la tgira d'uffants complementara a la famiglia en 25 vischnancas (Arosa, Cazas, Churwalden, Claustra, Cuira, Domat, Flem, Glion, Grono, Igis, Laax, Landquart, Maiavilla, Mustér, Panaduz, Puschlav, Samedan, San Murezzan, Savognin, Schiers, Scuol, Tavau, Tusaun, Valbella e Zuoz). La rait da purschidas vegn extendida permanentain. Dapi l'onn 2014 èn vegnidas avertas purschidas en sis novas vischnancas da staziunament, numnadain ad Arosa, Churwalden, Flem, Grono, Laax e Savognin. Tut en tut èn vegnids

tgirads l'onn 2017 2789 uffants en canortas, en centers dal di per uffants sco er da geniturs da di (numnads da qua envi canortas). Il chantun e las vischnancas han subvenziunà las purschidas l'onn 2017 cun 6,17 milliuns francs.

Tar la dumonda 1: Per elavurar e per examinar las opziuns d'agir vegn stimà il basegn total da la tgira d'uffants pajada en las regiuns a maun d'extrapolaziuns. L'analisa detagliada vegn fatga sin basa da las utilisadras e dals utilisaders actuals da las canortas.

Tar la dumonda 2: La supposiziun ch'ils custs normads divergeschian cunzunt en las regiuns da las expensas effectivas per mantegnair e per sviluppar las instituziuns, n'è betg vegnida confermada en las analisas da las instituziuns socialas ch'èn vegnidas fatgas fin ussa. Las instituziuns cun purschidas da la tgira d'uffants complementara a la famiglia vegnan infurmas en moda adattada davart ils resultats suenter la terminaziun da l'examinaziun.

Tar la dumonda 3: Las purschidas da la tgira d'uffants vegnan messas a disposiziun d'organisaziuns d'utilitad publica ch'èn organisadas per regla tenor il dretg privat en uniuns u en fundaziuns. Ellas fixeschan independentamain il nivel dals salaris da lur collavuraturas e collavuratur. Las dumondas davart la finanziaziun èn actualmain l'object da l'analisa.

Tar la dumonda 4: Ils criteris da qualitat per purschidas da la tgira d'uffants complementara a la famiglia en il Grischun fixeschan ils standards professiunals, persunals e finanzials. Quels vegnan approvads da la federaziun spezialisada per la tgira d'uffants ed èn la premissa per la permissiun da purschidas da la tgira d'uffants complementara a la famiglia.



En num da la regenza

Il president:

Dr. Mario Cavigelli

Il chancelier:

Daniel Spadin